

全唐诗卷五百三十四

卷 534_1

【再游姑苏玉芝观】许浑

高梧一叶下秋初，迢递重廊旧寄居。
月过碧窗今夜酒，雨昏红壁去年书。
玉池露冷芙蓉浅，琼树风高薜荔疏。
明日挂帆更东去，仙翁应笑为鲈鱼。

卷 534_2

【夜归驿楼】许浑

水晚云秋山不穷，自疑身在画屏中。
孤舟移棹一江月，高阁卷帘千树风。
窗下覆棋残局在，橘边沽酒半坛空。
早炊香稻待鲈鲙，南渚未明寻钓翁。

卷 534_3

【题灵山寺行坚师院】许浑

西岩一径不通樵，八十持杯未觉遥。
龙在石潭闻夜雨，雁移沙渚见秋潮。
经函露湿文多暗，香印风吹字半销。
应笑东归又南去，越山无路水迢迢。

卷 534_4

【湖州韦长史山居（即皎然旧宅）】许浑

一官唯买昼公堂，但得身闲日自长。
琴曲少声重勘谱，药丸多忌更寻方。
溪浮箬叶添醅绿，泉绕松根助茗香。
明日鲈鱼何处钓，门前春水似沧浪。

卷 534_5

【赠李伊阙】许浑

桐履如飞不可寻，一壶双笈峰阳琴。
舟横野渡寒风急，门掩荒山夜雪深。
贫笑白驹无去意，病惭黄鹄有归心。
云间二室劳君画，水墨苍苍半壁阴。

卷 534_6

【重游练湖怀旧】许浑

西风渺渺月连天，同醉兰舟未十年。
鵬鸟赋成人已没，嘉鱼诗在世空传。
荣枯尽寄浮云外，哀乐犹惊逝水前。
日暮长堤更回首，一声邻笛旧山川。

卷 534_7

【乘月棹舟送大历寺灵聪上人不及】许浑

万峰秋尽百泉清，旧锁禅扉在赤城。
枫浦客来烟未散，竹窗僧去月犹明。
杯浮野渡鱼龙远，锡响空山虎豹惊。
一字不留何足讶，白云无路水无情。

卷 534_8

【汴河亭】许浑

广陵花盛帝东游，先劈昆仑一派流。
百二禁兵辞象阙，三千宫女下龙舟。
凝云鼓震星辰动，拂浪旗开日月浮。
四海义师归有道，迷楼还似景阳楼。

卷 534_9

【村舍二首】许浑

自翦青莎织雨衣，南峰烟火是柴扉。
莱妻早报蒸藜熟，童子遥迎种豆归。
鱼下碧潭当镜跃，鸟还青嶂拂屏飞。
花时未免人来往，欲买严光旧钓矶。
尚平多累自归难，一日身闲一日安。
山径晓云收猎网，水门凉月挂鱼竿。
花间酒气春风暖，竹里棋声暮雨寒。
三顷水田秋更熟，北窗谁拂旧尘冠。

卷 534_10

【郑秀才东归凭达家书】许浑

欲寄家书少客过，闭门心远洞庭波。
两岩花落夜风急，一径草荒春雨多。
愁泛楚江吟浩渺，忆归吴岫梦嵯峨。
贫居不问应知处，溪上闲船系绿萝。

卷 534_11

【伤故湖州李郎中】许浑

政成身没共兴衰，乡路兵戈旅榘回。
城上暮云凝鼓角，海边春草闭池台。
经年未葬家人散，昨夜因斋故吏来。
南北相逢皆掩泣，白蘋洲暖百花开。

卷 534_12

【和友人送僧归桂州灵岩寺】许浑

楚客送僧归桂阳，海门帆势极潇湘。
碧云千里暮愁合，白雪一声春思长。

柳絮拥堤添衲软，松花浮水注瓶香。
南京长老几年别，闻道半岩多影堂。

卷 534_13

【淮阴阻风寄呈楚州韦中丞】许浑

垂钓京江欲白头，江鱼堪钓却西游。
刘伶台下稻花晚，韩信庙前枫叶秋。
淮月未明先倚槛，海云初起更维舟。
河桥有酒无人醉，独上高城望庾楼。

卷 534_14

【途经敷水】许浑

修蛾颦翠倚柔桑，遥谢春风白面郎。
五夜有情随暮雨，百年无节待秋霜。
重寻绣带朱藤合，更认罗裙碧草长。
何处野花何处水，下峰流出一渠香。

卷 534_15

【和人贺杨仆射致政】许浑

莲府公卿拜后尘，手持优诏挂朱轮。
从军幕下三千客，闻礼庭中七十人。
锦帐丽词推北巷，画堂清乐掩南邻。
岂同王谢山阴会，空叙流杯醉暮春。

卷 534_16

【题四皓庙】许浑

桂香松暖庙门开，独泻椒浆奠一杯。
秦法欲兴鸿已去，汉储将废凤还来。
紫芝翳翳多青草，白石苍苍半绿苔。
山下驿尘南窜路，不知冠盖几人回。

卷 534_17

【鹤林寺中秋夜玩月（一作八月十五夜宿鹤林寺玩月）】许浑

待月东林月正圆，广庭无树草无烟。
中秋云尽出沧海，半夜露寒当碧天。
轮彩渐移金殿外，镜光犹挂玉楼前。
莫辞达曙殷勤望，一堕西岩又隔年。

卷 534_18

【南海府罢归京口经大庾岭赠张明府】许浑

楼船旌旆极天涯，一剑从军两鬓华。
回日眼明河畔草。
去时肠断岭头花。
陶诗尽写行过县，张赋初成卧到家。

官满知君有归处，姑苏台上旧烟霞。

卷 534_19

【题卫将军庙】许浑

武牢关下护龙旗，挟槊弯弧马上飞。
汉业未兴王霸在，秦军才散鲁连归。
坟穿大泽埋金剑，庙枕长溪挂铁衣。
欲奠忠魂何处问，蒹花枫叶雨霏霏。

卷 534_20

【访别韦隐居不值】许浑

犬吠双岩碧树间，主人朝出半开关。
汤师阁上留诗别，杜叟桥边载酒还。
栢坞炭烟晴过岭，蓼村渔火夜移湾。
故乡芜没兵戈后，凭向溪南买一山。

卷 534_21

【送前东阳于明府由鄂渚归故林】许浑

结束征东换黑貂，灞西风雨正潇潇。
茂陵久病书千卷，彭泽初归酒一瓢。
帆背夕阳湓水阔，棹经沧海甌山遥。
殷勤为谢南溪客，白首萤窗未见招。

卷 534_22

【听歌鹧鸪辞】许浑

南国多情多艳词，鹧鸪清怨绕梁飞。
甘棠城上客先醉，苦竹岭头人未归。
响转碧霄云驻影，曲终清漏月沈晖。
山行水宿不知远，犹梦玉钗金缕衣。

卷 534_23

【寄题华严韦秀才院】许浑

三面楼台百丈峰，西岩高枕树重重。
晴攀翠竹题诗滑，秋摘黄花酿酒浓。
山殿日斜喧鸟雀，石潭波动戏鱼龙。
今来故国遥相忆，月照千山半夜钟。

卷 534_24

【戏代李协律松江有赠】许浑

蜀客操琴吴女歌，明珠十斛是天河。
霜凝蒹葭怯秋树，露滴芙蓉愁晚波。
兰浦远乡应解珮，柳堤残月未鸣珂。
西楼沉醉不知散，潮落洞庭洲渚多。

卷 534_25

【送黄隐居归南海】许浑

瘴雾南边久寄家，海中来往信流槎。
林藏狒狒多残笋，树过猩猩少落花。
深洞有云龙蛭骨，半岩无草象生牙。
知君爱宿层峰顶，坐到三更见日华。

卷 534_26

【朝台送客有怀】许浑

赵佗西拜已登坛，马援南征土宇宽。
越国旧无唐印绶，蛮乡今有汉衣冠。
江云带日秋偏热，海雨随风夏亦寒。
岭北归人莫回首，蓼花枫叶万重滩。

卷 534_27

【自楞伽寺晨起泛舟，道中有怀】许浑

碧树苍苍茂苑东，佳期迢递路何穷。
一声山鸟曙云外，万点水萤秋草中。
门掩竹斋微有月，棹移兰渚淡无风。
欲知此路堪惆怅，菱叶蓼花连故宫。

卷 534_28

【十二月拜起居表回】许浑

一章西奏拜仙曹，回马天津北望劳。
寒水欲春冰彩薄，晓山初霁雪峰高。
楼形向日攢飞凤，宫势凌波压扑鳐。
空锁烟霞绝巡幸，周人谁识郁金袍。

卷 534_29

【观章中丞夜按歌舞】许浑

夜按双娃禁曲新，东西箫鼓接云津。
舞衫未换红铅湿，歌扇初移翠黛颦。
彩槛烛烟光吐日，画屏香雾暖如春。
西楼月在襄王醉，十二山高不见人。

卷 534_30

【重游飞泉观题故梁道士宿龙池】许浑

西岩泉落水容宽，灵物蜿蜒黑处蟠。
松叶正秋琴韵响，菱花初晓镜光寒。
云开星月浮山殿，雨过风雷绕石坛。
仙客不归龙亦去，稻畦长满此池干。

卷 534_31

【下第贻友人】许浑

身在关西家洞庭，夜寒歌苦烛荧荧。

人心高下月中桂，客思往来波上萍。
马氏识君眉最白，阮公留我眼长青。
花前失意共寥落，莫遣东风吹酒醒。

卷 534_32

【晚登龙门驿楼】许浑

鱼龙多处凿门开，万古人知夏禹材。
青嶂远分从地断，洪流高泻自天来。
风云有路皆烧尾，波浪无程尽曝腮。
心感膺门身过此，晚山秋树独徘徊。

卷 534_33

【题故李秀才居（一作伤李秀才）】许浑

曾醉笙歌日正迟，醉中相送易前期。
橘花满地人亡后，菰叶连天雁过时。
琴倚旧窗尘漠漠，剑埋新冢草离离。
河桥酒熟平生事，更向东流奠一厄。

卷 534_34

【韶州韶阳楼夜宴（一作题韶州驿楼）】许浑

待月西楼卷翠罗，玉杯瑶瑟近星河。
帘前碧树穷秋密，窗外青山薄暮多。
鸂鶒未知狂客醉，鹧鸪先让美人歌。
使君莫惜通宵饮，刀笔初从马伏波。

卷 534_35

【闻韶州李相公移拜郴州因寄】许浑

诏移丞相木兰舟，桂水潺湲岭北流。
青汉梦归双阙曙，白云吟过五湖秋。
恩回玉宸人先喜，道在金滕世不忧。
闻说公卿尽南望，甘棠花暖凤池头。

卷 534_36

【游江令旧宅】许浑

身没南朝宅已荒，邑人犹赏旧风光。
芹根生叶石池浅，桐树落花金井香。
带暖山蜂巢画阁，欲阴溪燕集书堂。
闲愁此地更西望，潮浸台城春草长。

卷 534_37

【灞上逢元九处士东归】许浑

瘦马频嘶灞水寒，灞南高处望长安。
何人更结王生袜，此客虚弹贡氏冠。
江上蟹螯沙渺渺，坞中蜗壳雪漫漫。

旧交已变新知少，却伴渔郎把钓竿。

卷 534_38

【别张秀才】许浑

不知何计写离忧，万里山川半旧游。
风卷暮沙和雪起，日融春水带冰流。
凌晨客泪分东郭，竟夕乡心共北楼。
青桂一枝年少事，莫因鲈鲙涉穷秋。

卷 534_39

【别表兄军倅】许浑

卢橘花香拂钓矶，佳人犹舞越罗衣。
三洲水浅鱼来少，五岭山高雁到希。
客路晚依红树宿，乡关朝望白云归。
交亲不念征南吏，昨夜风帆去似飞。

卷 534_40

【题苏州虎丘寺僧院】许浑

暂引寒泉濯远尘，此生多是异乡人。
荆溪夜雨花开疾，吴苑秋风月满频。
万里高低门外路，百年荣辱梦中身。
世间谁似西林客，一卧烟霞四十春。

卷 534_41

【酬郭少府先奉使巡涝见寄兼呈裴明府】许浑

载书携榼别池龙，十幅轻帆处处通。
谢朓宅荒山翠里，王敦城古月明中。
江村夜涨浮天水，泽国秋生动地风。
饱食鲈鱼榜归楫，待君琴酒醉陶公。

卷 534_42

【出永通门经李氏庄】许浑

飞轩危槛百花堂，朝宴歌钟暮已荒。
中散狱成琴自怨，步兵厨废酒犹香。
风池宿鸟喧朱阁，雨砌秋萤拂画梁。
力保山河家又庆，只应中令敌汾阳。